



Kamis, 22 September 2022

Ogen: 1 Korinti 10: 13



Iberekenna Nge Gegeh



Ise nge kita si la pernah erbahan salah? Tentuna kerina kita pernah erbahan salah subuk galang nta kitik. Persoalen utamana e me mesera tuhu kita erlajar arah kesalahenta. Ula lebe arah kesalahen kalak sideban, arah kesalahenta jine pe mesera kal. Pengalamen kalak Israel mbarenda mbuktikensa maka labo nukah erlajar arah kesalahenta. Bagi nina Paulus i bas ayat 6-7 mpersingetisa gelah ula terjadi pengulangan kesalahen si seri. Si perlu sirenungken, maka Tuhan labo erbahan kesalahen tupung IA nepa kita uga kita litna gundari. Kita labo produk gagal aminna pe megati kita erbahan salah. Tupung sada perbeben reh man banta janah kita pe ndabuh ras kote ibahan perbeben e, je rasa bersalah mulai nderpa kita si erbahansa kita rukur guna ngukum dirinta jine. Memang percuban e reh man banta janah lit paksana maka labo kita ngasup guna erjuang piahna kita ndabuh. Tapi e kin si erbahanca maka si ukum dirinta jine? Janah e kin si erbahansa gedang kegeluhenta kita iayak-ayak rasa bersalah? Kerina percuban si reh man bandu e bali nge biakna ras percuban si biasa seh man manusia sideban. Tapi Dibata setia nge i bas padanNa. Labo ipelepasNa kam icubai lebih asa gegehndu. Asum kam ngenanami percuban, iberekenNa nge gegeh man bandu gelah ngasup kam nggengkenca janah radu ras si e iberekenNa pe dalan pulah. Labo patut kita ngukum dirinta jine sabap Dibata nge si mada kegeluhenta janah Ia setia kap. Lit gegeh ras dalan pulah ibereken Dibata man banta guna memulihkan kegeluhenta adi kita nggit. Erbahan salah e me sada peristiwa i bas kegeluhenta. 'Aku salah'. 'Ue, salah, i bas paksa si e, tapi labo silalap salah i bas kerina paksa. Bahanlah maka sada kesalahen si pernah silakoken ngajarken sada si bermakna i bas masa si reh enda. Erbahanca kita reh gegehna guna natap masa si reh alu pengarapen ras pasu-pasu si isediaken Tuhan banta.



Kesalahan benana erbahan si payo